

Colosenses

Jacheuayama

¹ Atše Pablo, Jesucristbe ichmoná Běngbe Bětsá chca yobóseyeca, y Jesucristbeyeca běngbe catšata Timotéoftaca, ² quem tsbuanácha sěntsabiamná chě Colosas puebloca Běngbe Bětsábenga imomněngbiama. Tšěngaftanga běngcá Jesucristbeñe ošbuáchiyěnga šmondměna, y chca, Jesucristbeyeca běngbe catšátanga. Atše sěntseimpadana Běngbe Bětsá Běngbe Taitá, chaoma tšabe bendicioněnga tšěngaftangbeñe chaotsemnana, y chaoma tšěngaftangbe ainaniñe tšabe ebionana chašmotsebomnana.

Pablo, Běngbe Bětsábioye tbojanimpadá Colosas puebloca ošbuáchiyěngbiama

³ Běngbe Bětsá, Běngbe Utabná Jesucristbe Taitá tšěngaftangbiama fstseimpadana ora, cha sempre fchandbėtsatschuanaye, ⁴ er běnga fsěnjátatšěmbona ntšamo tšěngaftanga Cristo Jesúsbeñe tša šmojtsošbuáchema, y ntšamo tšěngaftanga nyetscanga chě Běngbe Bětsábenga imomněnga šmababuányěshanama. ⁵ Natsanama, chě ndegombre buayenánama, chě tšabe noticiěnga, tšěngaftanga tcmojanabuatambá ora, tšěngaftanga botamana šmojanuena ntšamo chě buayenániñe bejtsayancá, chě tšěngaftanga šmojtsobena tšabe soyama jobátmana, Běngbe Bětsábeñe jtsošbuáchiyěse. Chě šmontsobatmana soye entsama tšěngaftanga

Jesucristbeñe puerte chašmotsošbuáchema y nyetscanga chašmotsababuányeshanama. Bëngbe Bëtsá celoca enduaquëcñá chë tšëngaftanga šmojtsobatmana tšabe soye. ⁶ Chë tšëngaftanga tcmojanabuayená tšabe noticiënga más bëtsá entšanga montsuenana; y chca, nyets quem luarentše entšanga montsiyena más tšabe soyënga jtsamëse. Chca entsemna ntšamo tšëngaftangbentše tojopasacá, chë natsana te chë tšëngaftanga Bëngbe Bëtsabe tšabiánama šmojanuena orscana, y ntšamo Bëngbe Bëtsá puerte bonshanánaca y tšabiánaca bëngbioye šuanyënama ndegombre cmojanosérta orscana. ⁷ Y chca Epafras tšëngaftanga tcmojanabuatambá, Bëngbe Bëtsabe bonshánama y tšabiánama. Epafras endmëna canya bëngaftaca Cristbiamama oservená, y cha bënga fsëndbobonshana; cha Cristbiamama endëtrabája bëngbe cuenta tšëngaftangbentše. ⁸ Cha šonjáuyana ntšamo chë Uámana Espíritu yojtsama, nyetscanga Jesucristbeñe ošbuachiyëngbioye chašmotsababuányeshanama.

⁹ Lempe ntšamo tšëngaftangaftaca tojopasama, chë natsana te tšëngaftangbiamama fsënjanuena orscana y mëntscoñama, Bëngbe Bëtsá sempre tšëngaftangbiamama fchandbétseimpadana, cháftaca fstsencuénta ora. Bëngbe Bëtsá fsëndëimpadana, chabe Espíritu chaoma tšëngaftanga chašmotsobena jtsetatšëmbuana y jtsosertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama. ¹⁰ Y chca, tšëngaftanga šmochantsobena jtsiyenana jtsamëse ntšamo

Bëngbe Utabná yobošcá, y sempre šmochántsama ntšamo chabíama tšabá yomncá. Ntšamo tšëngaftanga chašmojtsiyencá tšabe soyënga jtsamëse, chentšana nÿetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma. ¹¹ Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëts añemo chašmotsebmnama; y chca, tšëngaftanga chë padecena soyënguiñe chašmojtsemna ora, puerte uantadënga chašmotsemnama, y ainaniñe añémoca Bëngbe Bëtsábeñe becá chašmotsobátmanama. ¹² Y puerte oyejuayënga Bëngbe Taitá šmochántsatschuanaye, nda iuama bënga chamotsobena ntšamo cha chabe entšanga jatšatayama tojašebuachenacá jtsebmnama. Tšëngaftanga šmochanjóyëngacñe ntšamo cmojtsëtocancá celoca, chë corente buashinÿinÿana luarentše. ¹³ Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšentšana, y tojama chë chabe bonshana Uaquiñabe amëndayana bëngbe ainaniñe chamotsebmnama; ¹⁴ chábeyeca Bëngbe Bëtsá Satanasbe cucuatšentšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

Cristo tojanóbanayeca, entšanga Bëngbe Bëtsáftaca tšabá jtsatsmënana

¹⁵ Cristo tmonjáninÿe ora, bënga tmojántatšëmbona ntšamo Bëngbe Bëtsá yomnana; entšanga imojbena cha jinÿama, pero Bëngbe Bëtsábioye ndoñe. Cha, chë Bëngbe Bëtsabe

Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna. ¹⁶ Chábeyeca Bëngbe Bëtsá tojama lempe ntšamo celoca y quem luarentše yobinÿncá, lempe ntšamo chë entsanga imobena o ndoñe mondobena jinÿama soyënga, y chë espíritëngnaca chë imobena ínÿengbioye jtsamëndayana y obenana imobomna. Bëngbe Bëtsá, chábeyeca y chabiamá tojama, lempe ntšamo quem luarentše yobinÿncá. ¹⁷ Bëngbe Bëtsá cabá nÿetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá. ¹⁸ Cha endmëna nda nÿetscanga Bëngbe Utabnábeñe ošbuáchiyënga iuamënda, ntšamo chë bestšaše nÿetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotsebomnama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochtsatsmënënguentsana, cha chë natsaná chaotsemnama; nÿe cha canÿa chë más uámana luare chaotsebomnama, nÿetscañe chaotsemándayama. ¹⁹ Er Bëngbe Bëtsá yojanjuabná cachabiamá tšabá yojamna, lempe ntšamo cha yomncá, chabe Uaquiñábeñnaca chaotsemnama, ²⁰ y Bëngbe Bëtsá tojánbošena, Crístbeyeca nÿetsca soyënga quem luarentše y celoca, cháftaca tempcá tšabá chaotsatsmënama. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma

nÿetsca soyënga quem luarentše y celoca, cháftaca tempcá tšabá chaotsatsmënama.

²¹ Tempo, tšëngaftanga Bëngbe Bëtsá stëtsoye šmojanquedá y chábioye uayayënga šmojamna, bacna soyënga šmojanjuabná y šmojánama causa; ²² pero mora chabe Uaquiñáftaca, cha mo canÿe entšacá jóbanëse, Bëngbe Bëtsá tojama tšëngaftanga tempcá tšabá cháftaca chašmotsatsmënama; y chca tojama, tšëngaftanga chabe delante nÿets tempo chašmotsemnana; chora tšëngaftanga, chabe entšanga, ainaniñe ndocna bacna soye ndbomnënga chašmotsemnana, y ndocná chaodayana ntšamo šmojamcá ndoñe tšabá yontsemna ca. ²³ Pero tšëngaftanga cmontsamna chë bëtscá ošbuáchiyana šmondobomnana nÿets tempo jtsebomnana, Bëngbe Utabnábeñe jtsošbuáchiyama ndocna te ntjajbanacá. Nÿets tempo chë tšabe noticiënguñe šmochtsošbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nÿe chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmcá, Jesucristbiana buayenánama šmojanuena ora. Chë buayenánana endmëna ntšamo ba entšanga nÿetsca quem luarentša entšángbioye tmojabuayenacá, y atšbe trabajo endmëna cach tšabe noticiëngama entšanga jtsabuayiynayana.

Pablo, ošbuáchiyënga jasérviana trabajo tmojanbonÿé

²⁴ Atše corente sënjesoyejuá mora tšëngaftangbiana jasúfriama stsobenama. Ba

entsanga entsamna jasúfriana Cristo jasérviana, y atše sentsesufrina ntšamo Cristo tojansufricá, mora atše jtsesufrinèse chabe cuenta, ntšamo jasúfriama yomncá. Y ntšamo sentsesufrincá entsemna Crístbeñe ošbuáchiyëngbe tšabiamama, chë chabe cuerpcá imomnënga, chënga Crístbenga bëtsemnama. ²⁵ Bëngbe Bëtsá atše šojábema chë Jesucristbeñe ošbuáchiyëngbe canye ujabuachaná. Cachá chë trabajuama šojanábuayana, chca jamëse, tšëngaftangbe tšabiamama chaotsemnama. Chë trabajo endmëna, lempe ntšamo cha tojayancá entsanga jábuayenana. ²⁶ Bëngbe Bëtsá nyetsca entsanga ndoñe tonjanalesenciá, quem luare jobojátšama orscana y nyets tempo chë buayenánama chamotsetatšëmbuama; pero mora, chábenga imomnënga chë soye cha tojinÿanyé. ²⁷ Bëngbe Bëtsá yoboše, chabe entsanga imomnënga chamotsábuatmama ndayá tempo chënga ndoñe tonjaninÿanyecá; y yoboše chë ndoñe judiënga jinÿanÿiyama tša bëts y tšabe soye yomna chë ndegombre buayenánana, ndayá tempo ínÿenga ndoñe tonjaninÿanyecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábeñe puerte jtsošbuáchiyëse šmojtsovena jtsobátmanana, Bëngbe Bëtsá puerte bëtšëtsanga y uámanënga chácmbiamama, batšá ntšamo cachá yomncá. ²⁸ Bënga nyetscángbioye Jesucristbiamama fchandbëtsabuayiyaye; fchandbëtsëtsëtsnaye ndayá chënga ndoñe yontsamna jtsamana, y fsëndbëtsabuatambaye nyets osertanánaca ndayá chënga aíñe yojtsamna jtsamana, y chca,

nÿetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crísoftaca cánÿiñe mo canÿacá jtsemnëse. ²⁹ Chca chaotsemnana, atše bëtscá sëndëtrabája; y chca sëntsama, chë Cristo yoÿtsama atše chaitsebomnana bëtš obenánaca.

2

¹ Atše sëntseboše tšëngaftanga chašmotsetátšëmbo, Bëngbe Bëtšá becá tsimpadánana, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinÿe ošbuachiyëngnaca. ² Atše chca sëndana, tšëngaftanga y chënga ainaniñe bëtš añemo chašmotsebomnana, y cánÿiñe mo canÿacá chašmotsemanana, nÿetscanga jtsenbobonshánëse. Chca, nÿets osertánana tšëngaftanga chašmotsebomnana, y chë tempo Bëngbe Bëtšá entšanga ndoñe tonjaninÿanÿé buayenánana chašmotsetatšëmbuama, y chë buayenánana Cristbe soye entsemna. ³ Mo canÿe bëtscá bomnana iytëmena soycá pero mora ya uínÿenana, cachcá Crístbeñe entsemna nÿets osertánana y obenana Bëngbe Bëtšá jtsabuatmama. Chë soye tempo Bëngbe Bëtšá entšanga ndoñe tonjaninÿanÿé, pero mora Cristo yoÿtsama bënga chë uámana soyënga chamotsebomnana. ⁴ Atše chca sëntsichamo, botamana palabréngaca ndocná chacmondáingñema. ⁵ Er masque choca tšëngaftangaftaca atše ndoñe quetsátsmëna, atšbe ainana aíñe choca tšëngaftangaftaca entsemna; y atše puerte sëntsoyejuá tšëngaftanga

šmatenëyeunanama y nÿets tempo Bëngbe Bëtsábeñe šmojtsošbuáchema.

Crísoftaca cánÿiñe mo canÿacá jtsemnëse, entsanga ndegombre tšabe vida jtsebomnana

⁶ Tšëngaftanga Jesucrístbeñe ošbuáchiyënga šmojanóbiamama ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánÿiñe mo canÿacá tojtsemnacá. ⁷ Chca šmontsobena jamana, cháftaca cánÿiñe mo canÿacá nÿets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiamama buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

⁸ Cuedado šmochtsebomna, ndoñe šmatjaleséncia ndocná chaondëtsamama tšëngaftanga jtsajbanama Crístbeñe ošbuáchiyana jtsebomnana. Chca entsanga montseboše juabnëngaca tšëngaftanga jáingñama, nÿe básefta entsangbe juabnënga y tondayama ndoserverna juabnënga. Chë juabnënga jtsóbocanana ntšamo bëts taitanga básengbioye mond-betsabuátambayentšana y chë espíritëngbentšana, ndëmuanÿëngbiamama entsanga jtsejuabnayana chënga nÿetsca soyënguiñe imománda ca; pero Crístbentšana chë juabnënga ndoñe ntsóbocanana.

⁹ Cristo endmëna cachcá ntšamo Bëngbe Bëtsá yomncá, masque mo canÿe entsacá quem luarentše yojëftsiyena; ¹⁰ y Bëngbe Bëtsá tojama tšëngaftanga ndegombre tšabe

vida chašmotsebomnama, Crísoftaca cányiñe mo canyácá bétsemnayeca; y Cristo, nyetsca chë mándayënga y obenana bomnëngbiana más uamaná endmëna. ¹¹ Tšëngaftanga Crísoftaca cányiñe mo canyácá bétsemnayeca, mo uinýnananëngcá šmontsemna, tšëngaftanga Bëngbe Bëtsabe entšanga šmomnama. Quem uinýnanánana ndoñe quenátsmëna mo chë más delicadentše base bobachtema tmojatëtšcá, cach entšángbeyeca ntšamo judiënga monduamancá, pero aíñe entsemna cach Cristo nda tmojauinýnaná; y chë uinýnanánana entsemna, tšëngaftangbe ainanentšana Cristo bacna juabnënga jabuajuánayana. ¹² Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bétsemnama tšëngaftanga šmojtsošbuáchema, y chë obenana tojama Cristo cháuatayenama.

¹³ Inye tempo tšëngaftanga Bëngbe Bëtsabiana mo obanëngcá šmojamna, yapa bacna soyënga jtsamana šmojanamana causa y uinýnanánënga mo Bëngbe Bëtsabe entšangcá ndoñe šmonjámnyeca, pero aíñe šmojanamana bacna soyënga jtsamana nye ntšamo šmojanbošcá. Morna Bëngbe Bëtsá tojama tšëngaftanga tšabe

vida chašmotsebomnama, Crístoftaca cánÿiñe mo canÿacá jtsemnëse, y Bëngbe Bëtsá bëngbe nÿetsca bacna soyënga šojtsaperdoná. ¹⁴ Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciónaca imojtsemna chë ndebénana pronto jtobocana ca, pero chë entšá chëchangá tojtsandbiana chë entšanga cha ndoñe más chamondëtsendebënana, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. ¹⁵ Jesucristo cruciñe tojanóbanayeca, Bëngbe Bëtsá tojanayënjaná Satanás y chabe bacna espíritënga obenana bomnënga y ínÿengbioye amëndayënga; y nÿetsca entšangbe delante tojaninÿanÿé cha chënga jtsamëndayama yobenama, mo canÿe reycá chë ínÿënga tojayënjaná ora, chabe entšángaftaca natsana jtsayana y chë ayënjanánëngna ústonoye.

Ainaniñe becá jtsebošana chë ošbuáchiyëngbiana celoca yomna soyënga

¹⁶ Ndoñe caso šmattsabiamnaye, ndoñe tšabá šmontsama ca ínÿënga tšëngaftangbiana tmojtsichamo ora, ndayá tšëngaftanga šmétsesaye o šmétsofsëšnayama, o ndayá aiñe o ndoñe šmondbétsamama Bëngbe Bëtsá jadórama fiestënga ora o shbojueta fiesta ora, o jóchnama tese. ¹⁷ Bayté entsemna, Bëngbe Bëtsá entšangbe cucuatšinë chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninÿanÿnaye ndayá más chcoye

jopásama; entšángbioye yojaninŷanŷnaye ndayá Cristo yochjanmama. ¹⁸ Báseftanga mondmëna y chënga mo nduamanëngcá entšángbeñe jtsebínŷnana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana bëts soyënga mo otjenayoquëcá tmojinŷe ca, y nŷe cachënga puerta jtsenábotamnayana, pero chca chamotsamama razón ndoñe quemátsbomna, er nŷe ntšamo inŷe entšanga imnetsejuabnaycá chëngnaca cachcá jtsejuabnayana. ¹⁹ Chënga Jesucrísoftaca cánŷiñe ndoñe tmonjoquedanga, y Cristo endmëna chë nŷetsca ošbuáchiyëngbe amëndayá, mo chë bestšaše nŷets cuerpo jtsemandayancá. Canŷe cuerpiñe chë bestšaše jtsamana nŷets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nŷetsca chë cuerpentša soyënga chamenefjanama jtsamëse. Cachcá, Cristo jtsamana nŷetsca ošbuáchiyënga cánŷiñe mo canŷacá cháftaca chamotsemnana, y cada te más tšabá cha chašmotsábuatmama.

²⁰ Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentše imománda espíritëngbe cucuatšentsana. As, ¿tšëngaftanga ndáyeca šmojtsiyena jtsamëse mo chë nŷe quem luarama enojuabnayëngcá? ¿Ndáyeca tšëngaftanga cabá šmobedecena chca mandënga,

mo: ²¹ “Chë soye ndoñe matsbanana, chca soye ndoñe catjase, o chë soye acbe cucuátseca ndoñe catjaca ca”? ²² Lempe chë mandënga, chë ndayá canya ndoñe bontsemna jamana, nye soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nye ntšamo entšanga mondbetsamcá y ínÿengbioye mondbetsabuatabaycá. ²³ Ndegombre, ba entšanga jtsejuabnayana chë mandënga tmojamëngbiana, puerte osertanána chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórama yomncá imojtsabuatabá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentsana ndoñe ntjajuánana chë bacna soyënga jtsamama juabnënga.

3

¹ Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiana yobomncá; y choca, Cristo uámana puestentše endëtbemana, Bëngbe Bëtsabe catšbioica. Y šmochtsinÿinÿnaye chca šmojtsebošama, ntšamo jtsamëse mora šmojtсийenama. ² Tšëngaftanga nÿets tempo chë celoca soyëngama šmochtsejuabnaye, ndoñe

chë nÿe quem luarentſe yomna soyëngama.
³ Tſëngaftanga Críſtoftaca cánÿiñe mo canÿacá
 jtseññe, jtseñnana mo tſëngaftanga ya
 cuaſjobancá, er mora ya ndoñe queſmátiyena
 tempcá jtsamëse. Críſto, Bëngbe Bëtsáftaca cánÿiñe
 mo canÿacá endmëna, y Críſto endmëna nda mora
 tſëngaftangbe vida yojtsinÿena. ⁴ Ndegombre,
 Críſto endmëna nda endama tſëngaftanga tſabe
 vida chaſmotſebomnama; y quem luarentſe
 cha cachiñe chaojtonÿná ora, tſëngaftangnaca
 chentſe cháftaca ſmochántsemna, y chora ntſamo
 Críſto corente uamaná y bëtsá yomnama
 Bëngbe Bëtsá yochjinÿanÿiyca, tſëngaftangbiámnaca
 echanjínÿanÿiye más bëtsétsanga y uámanënga
 ſmojtseñnana.

Tempſca vida y morſca vida

⁵ Tſëngaftanga, ntſamo chë nÿe quem luarama
 enójuabnayënga mondbetſeboſcá boſana lempe
 ſmochtsajbaná. Ndocná chaondëtſeboſe ndaye
 bacna soye boyabáſa o ſhembáſaftaca jtsamana,
 ni chca soyënguiñe ndoñe chaondëtſejuabná;
 ndoñe chaondëtſiyena nÿe ínÿengbiana bacna
 juabnënga jtſebomñe, y ndoñe chaondëtſeboſe
 nÿe bëtscá soyënga ínÿengbiana más jtſebomnama,
 er chca jtsamana jtsayanana, chabiana más
 yojtsámana soyënga jtſebomnana, Bëngbe Bëtsá
 jatsbobonshánama. ⁶ Er entſanga mondmëna
 y chënga chca soyënga jtsamama jtſeboſana,
 y Bëngbe Bëtsá ndoñe ntſeyeunanana. Chca
 entſángaftaca Bëngbe Bëtsá puerte bochanjetna,
 y echanjamánda chë uabouana caſtigo chëngbeñe
 chaotseñnana. ⁷ Y tempo, tſëngaftanga

šmojanijena jtsamëse, sempre nÿe chca bacna juabnëngaca, ⁸ pero mora tšëngaftanga cmontsamna lempe quem soyënga stëtsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyáanguana, y ndoñe tšabe palabrënga jtsóyebuambnayana. ⁹ Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátsmëna, y mora ndoñe quešmátijena jtsamëse ntšamo tempo šmojanamcá. ¹⁰ Y mora tšëngaftanga šmojashjache jtsemnama mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entšangcá tcmojábiamana; y cha nÿets tempo yojtsama, tšëngaftanga cada te más ntšamo cha yomncá chašmotsemnama, chca, corente tšabá cha chašmuábuatmanama. ¹¹ Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentše base bobachtema tëtšenënga ndoñe más uámanënga quemátsmëna chë ndoñe chca mondmënëngbiamana; chë inÿe luarëngocana áshjajnënga, bën tjoye oyenënga, chë nÿe ínÿabiamana nÿets tempo oservënënga y chë cachëngbiamana trabájayënga, nÿetscanga cachcanga mondmëna. Chë nÿe ndayá iuámana endmëna Crístbeñe jtsošbuáchiyana y nÿetsca ošbuáchiyëngbe ainaniñe cha yojtsemna jtsemándayama.

¹² Tšëngaftanga Bëngbe Bëtsábenga šmondmëna. Cha cmondábabuanÿeshana y tcmojabacacá chabe entšanga chašmotsemnama; chíyeca,

tšëngaftanga cmontsamna ínyenga jtsinÿanÿnayana nÿetscangbiana jóngmiana šmuamanama, tšabe juabna ínyengbiana sempre šmnétsebonnama, cada ona chë ínyenga chabiana más uámanënga cuaftsemncá imnétsejuabnayama, nÿetscanga puerte bonshanánaca šmnétsënÿayama, y nÿetsca padecena soyënguiñe corente uantadënga šmomnama. ¹³ Nÿetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínyenga šmochjáperdonaye. ¹⁴ Lempe chë soyëngama más enduámana nÿetscanga jtsenbobonshánana. Nÿetscanga šmojtsenbobonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá. ¹⁵ Cristo endama tšëngaftangbe ainaniñe tšabe ebionana chašmotsebonnama. Chë tšëngaftangbe ainaniñe tšabe ebionánaca šmochtsiyena nÿetscanga natjëmbana, Jesucrístbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nÿetscanga cánÿiñe mo canÿe cuerpcá chašmotsemnama, y chca, natjëmbana chašmotsiyenama. Bëngbe Bëtsá sempre šmochtsatschuanaye.

¹⁶ Chë Cristbe puerte tšabe buayenana soyënga tšëngaftangbe ainaniñe nÿets tempo šmochtsambaye. Nÿets osertanánaca šmochtsenbuátëmbaye y šmochtsenbuayiynaye. Nÿets ainánaca šmochjacánta chë Salmos

librěšaňe uabemana cantěnga, chě Jesucristbe soyěngama cantěnga, y chě Běngbe Bětsabe Espíritu iuama tšěngaftanga chašmotsobena jacántama soyěnga; chca šmochjama Běngbe Bětsá jětschuayama. ¹⁷ Y lempe ntšamo chašmojtsama o chašmotsichamcá, Běngbe Utabná Jesúsbeňe ošbuáchiyěnga quetsomñecá chca šmochjama, sempre Běngbe Bětsá Běngbe Taitábioye, chábeyeca jtsatschuanayěse.

Ntšamo ín̄yengaftaca jtsiyenama

¹⁸ Shémanga, šmochtsetátšěmbo tšěngaftangbe boyanga chě yebnentša mándayěnga imonama, y n̄yets tempo chca jtsejuabnayěse šmochtsiyena, er tšěngaftanga Běngbe Utabnábeňe ošbuáchiyěnga quetsomñecá, chca cmontsamna. ¹⁹ Boyanga, tšěngaftangbe shémanga sempre šmochtsababuán̄yeshana, y podesca palabřengaca ndoňe šmattsětsěsnaye.

²⁰ Básenga, tšěngaftangbe bětsětsanga n̄yětscaňe šmochtsayaunana; chca šmojtsaměse, Běngbe Bětsá oyejuayá echántsemna. ²¹ Taitanga, ndoňe šmattsama tšěngaftangbe básenga chauetěnama, ainaniňe tondaye añémoca chěnga ndoňe chamondětsatsměnama.

²² Tšěngaftanga chě n̄yets tempo n̄yē ín̄yabiamama oservéněnga, tšěngaftangbe nduiňěnga n̄yětscaňe šmochtsayaunana, y ndoňe n̄yē chěnga tcmojtsěnyá ora, mo nda n̄yē entsangbe delante tšabá joquédama tojtsebošacá, ndayá chěnga šmochtsayaunana n̄yets ainaniňe ndegombre tšabe juabněngaca, er tšěngaftanga Běngbe Utabnabiamama corente respeto šmondbomna.

23 Lempe ntšamo chašmojtsamcá, nyets tšëngaftangbe añémoca šmochtsama, mo Bëngbe Utabná ndegombre cuaftserveservencá, y ndoñe nýe entšangbioycá. 24 Tšëngaftanga ya šmondětatsšëmbo, ntšamo cha chabe entšanga tojašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábenga tšëngaftanga šmomnana, y cha šmondëservena. 25 Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entšá bacna soyënga tojamcá, er Bëngbe Bëtsabiana nyetscanga cachcá monduámána.

4

1 Y tšëngaftanga, ndëmuanyëngbiana ínýenga nyets tempo imoservena, nyetsca soyënguiñe tšabá šmochtsama, y nyetscangbiana cachcá šmochtsemna, chë nyets tempo nýe tšëngaftangbiana oservenëngaftaca, er tšëngaftanga šmondětatsšëmbo celoca canya endmëna, ndabiana tšëngaftángnaca oservénënga šmondmëna.

Ošbuáchiyënga jábuayenama

2 Nyets tempo Bëngbe Bëtsáftaca šmochtsencuéntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse. 3 Bëngbe Bëtsáftaca cha šmojtsencuénta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiana entšanga jábuayenama, chë buayenana soye ndayama tempo entšanga ndoñe monjántatsšëmbo.

Atše chë buayenana soye entšanga abuatambaye causa, mora cárceloye sentsétámena. ⁴ Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entšanga jabuatambama, y chë soye atše chaima chënga corente tšabá catafjosertaycá, er atše šontsemna chca jamana.

⁵ Smochtsiyena nyetsca soyënga osertanána jtsamëse chë Jesucristbeñe ndošbuáchiyëngaftaca, y chca, nyets tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bétsemnama. ⁶ Inÿengaftaca chašmojtseencuénta ora, šmochtsama ntšamo šmojtsoyebuambnacá chëngbiana tšabá chaotsemnama, y soyënga šmochtsichamo nyetscanga oyejuayana chamotsebomnama; y šmochtsetátšëmbo ntšamo cmojtsamna cada cánÿabioye jojuana.

Jtadiósoftanama

⁷ Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiana bëngaftaca oservená, tšëngaftangbioye noticiënga echanjuamba ndayá átšeftaca tojopasama. ⁸ Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañémuayama. ⁹ Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

¹⁰ Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase.

¹¹ Jesús, chë Justo cánaca uabainá, chánaca cmontsacheuaná. Quem pueblentša nyetsca judiënga ošbuáchiyënguentsana, nyë chë unga átšeftaca mondëtrabája, Bëngbe Bëtsabe amëndayana entšángbioye chaóshjanguama, y chënga mondama atše ainaniñe bëts añemo chaitsebomnama.

¹² Epáfrasnaca cmontsacheuaná, inyë tšëngaftangbiocá y cha Cristo Jesusbiamá jatrabájama endoservena. Cha nyëts tempo tšëngaftangbiamá Bëngbe Bëtsábioye tša bochandbëtseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyëts tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá.

¹³ Cach atše sënjinýe y sëntsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëngnaca.

¹⁴ Lucas, bëngbe bonshana ashnayá, cmontsacheuaná; y Démasnaca.

¹⁵ Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nyëtsca ošbuáchiyënga chë

Bëngbe Bëtsá jëtschuayama chabe yebnentše jénefnama imuamanëngnaca. ¹⁶ Quem tsbuanácha chašmojualiá chentsana, Laodiceoca ošbuachiyëngbioye šmochjuíchmua, chócnaca mëcha chamualiama; y tšëngaftángnaca šmochjualiá chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuáshjango ora.

¹⁷ Arquipo šmochjauyana yejuana chaotsant-ješna chë Bëngbe Bëtsá tbojabonyé trabajo sempre tšabá chaotsocumplínama.

¹⁸ Atše Pablo, nýe quem palabrënga tšëngaftanga jacheuayama cach atšbe cucuátšeca sëntsabiarná. Smochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 21 Feb 2024 from source files
dated 29 Jan 2022
19104c0e-9046-5ff3-82fb-eb838c88dcf9